

Ilanngussaq 4.

Torersaarnissamut maleruagassat

Ilaqutariinnut arlalinnut inissiani sanilinet najugaqaqatinullu mianerinninnissaq pingaaruteqarpoq. Najugaqartut akunnerminni ajunngitsumik pissuseqarfigisarnerat najugaqarfimmi pitsaasumi toqqissisimanissamut atugarissaarnissamullu annertuumik sunniuteqaqataasarpoq.

Inissiap illuullu pitsaasumik paarineqarnerat ajoqusikkat amerlassusaannik killilersueqataasinnaavoq. Attartortup ajoqusikkat, attartortup nammineerluni inuilluunniit allat attartortup inissiamut isernissamut akuerisaasa paarsinerlunnerisigut sumiginnaanerisigulluunniit pilersut tamaasa attartortup taarsertussaavai. Attartortup qularnaveeqqusiinermut kontoani uninngasuutigineqartut attartortup ajoqusigaanut attartortitsisup iluarsaassinermut atorsinnaavai. Aamma qularnaveeqqusiinermut konto ineqarnermut kiassarnermullu akiligassanut akilinngitsuukkanut matusissutigineqarsinnaavoq. Attartortitsisup attartorneq atorunnaarsissinnaavaa, attartortup inissiaq paarinerluppagu, aserorteriffigippagu imaluunniit attartortoq ineqarnermut kiassarnermullu akilinngitsuukkaminik akiligassaqaalerpat.

Eqqagassat

Illuummi eqqagassanut nakkartitsisarfeqarpat, igitassat nakkartitsisarfikkut iginneqannginnerminni pappiaqqamut poortorluarneqarsimassapput imaluunniit puussiamut ikineqarsimassallutik. Illuutini eqqagassanut nakkartitsisarfeqanngitsuni igitassat inissitaasimasunut igitassat iginneqartassapput. Igitassat majuartarfeqarfinnut imaluunniit eqqaaveqarfiit naqqinut iliinnarneqassanngillat.

Torsuusarsuaasat majuartarfiillu ataatsimoorussat

Attartortoq inissiap najugarisap silataani torsuusarsuaasap majuartarfiillu salliarnartaasaata eqqiluisaartinneqarnerani peqataassaaq. Sikkilit, meeraaqqanut aneerussissut, qamutit pequtillu suulluunniit majuartarfinni, majuartarfiit sangoriaanni torsuusarsuaasaniluunniit inissisimatinneqaaqusaanngillat.

Antennit

Attartortitsisoq allakkatigut akuersiteqqaarnagu silami antenninik ikkussuisoqaqqaanngilaq. Akuersissuteqarnissami attartortup qularnaveeqqusiissutissamik akiliinissaa piumasarineqarsinnaavoq. Antenni ikkunneqarnermini kingusinnerusukkulluunniit illuummut ajoqusiisimappat ajoqusikkap iluarsineranut aningaasat atorneqarsinnaapput.

Uffarfiit, kuutsitsiviit, perusersartarfiit, erngup qorlorfii il.il.

Annoraaminernik, qiviuisanik assigisaannilluunniit perusersartarfinnut imernik errortortakkanut igitseqqusaanngilaq. Attartortitsisoq piaartumik erngup qorlorfii, perusersartarfiit imiisiviit quisarfiilu ussiitsut, imaluunniit erngup aqqutaani ussiitsut allat pillugit nalunaarfigineqassaaq.

Mingutsitsineq

Ataatsimoorussamik atorineqartut, soorlu majuartarfeqarfiit, kaajaluisat imaluunniit pinnguartarfiit mingutsinneqaqqusaanngillat. Illup iigai qisuttaaluunniit titartuiffiqeqqusaanngillat, kigartorneqaqqusaanatik qalipanneqaqqusaanatuunniit. Attartortitsisoq pisariaqarfiisigut attartortup akisussaasup akiligassaanic eqqiaasinnaavoq pitsanngorsaasinnaallunilu.

Uumasuuteqarneq

Aallaaviatigut qimmiuteqarnissaq imaluunniit qitsuuteqarnissaq, kiisalu aalisagaasivimmiittunik aalisagaateqarnissaq, ineqartinneqartunik timmiaateqarnissaq, kikkaasunik ineqartinneqartunik aamma saanilunnik assigisaannilluunniit uumasuuteqarnissaq akuerisaavoq.

Taamaattoq najugaqatigiiffimmi siulersuisut aalajangersinnaapput qimmiuteqarneq qitsuuteqarnerlu taamaakkaluartoq najugaqatigiiffimmi akuerisaassanngitsoq. Qimmiutinut qitsuutinullu immikkut qularnaveeqqusiinissaq attartortitsisup piumasarisavaa. Attartortup kommunimi qimmiuteqarnermut qitsuuteqarnermullu malittarisassiani maleruagassat sukkulluunniit naammassisimassavai. Maleruagassat taakkua naammassineqanngippata, ileqqorissaarnissamut maleruagassat unioqqutinneqarsimasutut isigineqassaaq. Ileqqorissaarnissamut maleruagassat unioqqutinneqarnerannut naammagittaalliuutigineqartut attartortitsisumut ingerlatinneqassapput.

Sannatit, nipilersorneq il.il.

Sakkut nipiliortut, soorlu qillerutit, eqqaamiut eqqarsaatigalugit taamaallaat nal. 8-ip aamma nal. 19-ip akornanni atorineqaqqusaapput. Majuartarfinni, torsuusaasarsuarni imaluunniit naqqut iluini nipiliorluni pinnguartoqaqqusaanngilaq. Radio, fjernsyni, båndoptageri, oqaluttartoq imaluunniit CD-mik nipilersuut eqqaamiunut akornutaasumik atorineqaqqusaanngillat. Nalliuttorsiornerit nipiliorfiusut eqqaamiut tamatumunnga akuersiteqqaarsimatinnagit ingerlanneqaqqusaanngillat. Nipilersortartut sungiusartarneri imaluunniit nipilersornermik ilinniartitsisarnerit attartortitsisumut isumaqatigiissutigineqaqqaarsimassapput.

Tamalaannik toqqorsiviit - piliviit

Tamalaannik toqqorsivinni - pilivinni ininiluunniit assigisaani ikuallajasunik, soorlu benzinamik, petroleumik, terpentiniimik lakkimillu uninngatitsisoqaqqusaanngilaq. Attartortup init taamaattut parnaarsimasarnissaat isumagisassaraa – atorineqanngikkaluarpataluunniit.

Kiassaait imermik imallit

Kiassaait imermik imallit ussiillisimappata imaluunniit kiassaateqarfimmit aqqaata arlaat ussiitsoqalersimappat, tamanna pillugu attartortitsisoq piaartumik nalunaarfigineqassaaq.

Allagartalersuineq

Allagartalersuinerit, tassani matumi allagartalersuutit kisiisa pinnagit, attartortitsisumit allaganngorlugu akuerineqarsimassapput.

Errorsineq

Atuisut allat assigalugit attartortoq errorsisarfinnik atuisinnaatitaavoq. Errorsisarfinnik atuneq najoqqutassiat nivinngarneqarsimasut malillugit aammalu inuup nammineq

akisussaaffigisaanik ingerlanneqartassaaq. Errorsisarfiup atortui pissusissamisuumngippata, errorsisarfinnik nakkutilliisut attartortitsorluunniit nalunaarfigineqassapput. Aneersuarterfinni errortanik panersiinerit sanilinet akornutaassanngillat.

Inigisami allannortiterinerit

Attartortoq talulersueqqusaananilu talunik piiaaqqusaanngilaq. Aamma attartortitsisoq allaganngorlugu akuersissuteqarsimatinnagu inissiami allanik allannortiterinissaq inerteqqutaavoq. Allannortiterinissaq akuerineqarsimappat, allannortiterinermut aningaasartuutit tamaasa attartortup akilissavai. Attartornerup atorunnaarnerani allannortitikkat pissuserisimasamittut ilisinneqaqqinnissaat piumasarineqarsinnaavoq. Pissusitoqaanut utertitsineq attartortumit suliarineqassaaq imaluunniit taassuma akiligasaanik suliaritinneqassalluni. Allannortiterinerit attartortitsisoq allaganngorlugu akuersiteqqaarnagu suliarineqarsimasut paasineqarnerminni ingerlaannaq attartortup akiligasaanik pissusitoqqamittut ileqqittussanngortitaasinnaapput.

Torersaarnissamut maleruagassat maleruarneqassapput

Torersaarnissamut maleruagassat imaluunniit attartornermut peqqussutip tamatumunnga aalajangersagartai naapertorlugit torersaarnissamut maleruagassatut akuersissutigineqarsimasut attartortup maleruanngippagit, tassa torersaarnissamut maleruagassat annertuumik unioqputinneqarsimappata, attartortitsisup attartorneq unitsissinnaavaa.

Torersaarnissamut maleruagassat allanuinaq atuuttussiaanngillat.